



Ince la sajun d'aisciüda por la squadra dl U8 da La Val é ruvada a piz. Chësta ultima sabeda éi gnü tigní a San Johann le torné de contlujiun.

Cun i 22 de auri é scomencé la sajun de retüda por la squadra di mituns, che á tut pert al campionat VSS dl raiun de Puster.

Le campionat é structuré atramënter co le campionat U10, vigni fin dl'edema vëgnel organisé sön en ater ciamp n torné anter deplö scuadres che se mosöra üna cun l'atra te döes o ince trëi partides.

Le campionat dl'U8 s'á spo stlüt jö ai 10 de jügn a San Johann cun le torné de contlujiun.

La squadra di mituns da La Val à fat bela parüda y à arjunt chisc resultac:

La Val – Latzfons/Verdings vërd **2-1**

Valdaora brüms – La Val **1-4**

La Val – Obopuschtra Haie **4-0**

Burnech vërc – La Val **1-1**

Alta Badia – La Val **1-1**

Dlungia i alenamënc y l'insegnamënt de fa rode le palé ti vëgnel ince insigné ai sogadus bel da pici insö de gran valurs, sciöche le crësce adüm, davagné düc adüm y perde düc adüm.

En gran giulan ti va ala Monica Moling cun l'aiüt de Eppe Miribung, che á alené cun lezitënza la squadra fora por düt l' altonn y l'aisciüda. En giulan ti va ince ai geniturs y a düc i acompagnadus che porta i mituns ales partides o da só contribut ala squadra. Giulan y ma inant insciö!

In dumënia ai 09.03.2014 él gnü organisé dal Uniun dl Sport Amatoriala da La Val la terza ediziun dla gara de schi alpinism in memorial de Alexander Ellecosta. Les condiziuns tlimatiches ne podô ester damì, le cîl senza na niura à fat da cornisc al bel event sön armentara.